

Министр Е. Досаевтың «Қазақстан Республикасының кейбір заңнамалық актілеріне салық салу мәселелері бойынша өзгерістер мен толықтырулар енгізу туралы» Заң жобасы туралы Парламент Мәжілісінде сөйлейтін сөзі

Құрметті Гүлжан Жанпейісқызы!

Құрметті депутаттар!

Сіздердің қарауларыңызға «Қазақстан Республикасының кейбір заңнамалық актілеріне салық салу мәселелері бойынша өзгерістер мен толықтырулар енгізу туралы» Заң жобасы енгізіліп отыр.

Заң жобасын әзірлеу Мемлекет басшысының жекелеген тапсырмаларын, бұдан бұрын қабылданған заңнамалық актілерді іске асыру, сондай-ақ Салық салу мәселелері жөніндегі консультативтік кеңестің шешімдерін орындау қажеттігіне байланысты туындауда.

Заң жобасы Экономикалық даму және сауда министрлігі жанындағы салық заңнамасын жетілдіру мәселелері жөніндегі жұмыс тобында жинақталған ұсыныстарды ескере отырып әзірленді. Аталған жұмысқа бизнес өкілдері де белсенді түрде қатысты.

Заң жобасында қарастырылған өзгерістер мен толықтырулар:

- азаматтардың жекелеген санаттарын және экономика салаларын қолдауға;

- салықтық әкімшілендіруді жетілдіру мен бизнес-ахуалды өзгертуге;

- салық төлеушілердің салықтық міндеттемелерді орындауын жеңілдетуге;

- салық заңнамасының жекелеген нормаларының қайталанылуын жою мен нақтылауға бағытталған.

1. Азаматтардың жекелеген санаттарына әлеуметтік қолдау көрсету мақсатында заң жобасында:

- мүгедек баланың қорғаншысының, қамқоршысының табысын;

- Президент пен Үкімет бекіткен арнаулы және атаулы мемлекеттік стипендияларды салық салудан босату көзделеді.

2. Отандық өндірушілер үшін бәсекелестік жағдайларын теңестіру мен оларға қолдау көрсету мақсатында:

- түсті және қара металл қалдықтары мен сынықтарын өткізу айналымдарын ҚҚС-тан босату;

- алкогольдік өнім мен этиль спиртінің өндірісінде қолданылатын шарап материалдарына акциз ставкасын 20-дан 0 теңге/литрге дейін төмендету;

- уранды өндіру басталған соң жер асты ұңғымалық сілтілеу тәсілімен оны өндіруге дайындық жұмыстарының шығыстарын шегерімдерге жатқызу мүмкіндігі;

- «Павлодар», «Сарыарқа», «Шығыс қорған – Қорғас» еркін экономикалық аймақтар аумақтарында жеңілдік салық салу тәртібін;

- жолдардың барлық санаттары бойынша республикалық маңызы бар жалпы қолданыстағы автокөлік жолдарының бөлінген жолағында сыртқы жарнама орналастыру төлем-ақы ставкаларын 3 есеге төмендету;

- мүліктерді қаржылық лизингке беру операцияларын ҚҚС-тан босатуды 2017 жылға дейін ұзарту көзделеді.

Ауыл шаруашылығы өнімдерін қайта өңдеуді жүзеге асыратын салық төлеушілер үшін Салық кодексінің 267-бабын ҚҚС-ты 70% азайту бөлігінде қолдану міндеттілігі алып тасталады. Бұл ауыл шаруашылығы өнімдерін экспортқа шығаратын кәсіпорындарға ҚҚС-тың артық түскен сомасын қайтаруды талап етуге мүмкіндік береді.

Банк секторын тұрақтандыруды қолдау мақсатында Қаржылық есеп берудің халықаралық стандартының талаптарына сәйкес үмітсіз және күмәнді активтерге қарсы провизиялар құруға ауысуына және динамикалық резервтер құруға байланысты екінші деңгейдегі банктердің қызметіне салық салуға толықтырулар енгізу қарастырылуда.

Келісімшарт аумағын кеңейткен кезде жер қойнауын пайдаланушының қол қойылатын бонусты төлеу жөніндегі міндеттемелері белгіленеді.

Зиянды шығарындыларды азайтуға ынталандыру үшін сұйытылған газға белгіленген ставкалар деңгейінде керосинді қолданғаны үшін (авиациялық отын ретінде) қоршаған ортаға эмиссия төлемақысының ставкалары енгізілуде.

3. Дербес білім беру ұйымдарының қызметіне салық салу бойынша толықтырулар енгізіледі, олар:

- дербес білім беру ұйымдарының білім беру қызметтерін көрсетуін ҚҚС-тан босатуды;

- дербес білім беру ұйымдары төлейтін роялти түріндегі табысқа (авторлық құқық, «ноу-хау» және т.б. қолдану төлемақысы) салық салудан босатуды көздейді.

4. Қосарланған салық салуды болдырмау мақсатында:

- шетелдік компаниялардың тұрақты мекемелерінің басқарушылық және жалпы әкімшілік шығыстарын шегерімдерге жатқызу тәртібі нақтыланады;

- Кеден одағы шеңберіндегі өзара саудада қосарланған салық салуды болдырмау нормалары енгізіледі.

5. Салық төлеушілердің салықтық міндеттемелерін орындауын жеңілдету және бизнесті жүргізу жағдайын жақсарту

мақсатында салықтық әкімшілендіруді жетілдіру бойынша нормалар кешені көзделген.

Салықтық әкімшілендіру саласындағы жаңа енгізулердің арасынан мыналарды бөліп көрсету қажет:

- электрондық шот-фактураларды енгізу;
- жеке кәсіпкерлер мен заңды тұлғалардың жекелеген санаттарын жоюдың ықшамдалған тәртібін белгілеу;
- жеке кәсіпкерлердің жекелеген санаттарын бухгалтерлік есеп жүргізуден босату;
- оңайлатылған декларация негізінде арнаулы салық режимін қолданатын субъектілер үшін салық кезеңін тоқсандық кезеңнен жартыжылдық кезеңге өзгерту;
- арнаулы салық режимдерін қолданудың хабарламалық сипатына ауысу және электрондық патенттерді енгізу;
- бюджетке төленетін төлемдер мен жекелеген салықтарды төлеу тәртібін өзгерту.

Жалпы, заң жобасын қабылдау салық нормаларын қолдану кезінде туындаған проблемаларды жоюға, бизнес-ахуалды өзгертуге және еліміздің одан әрі тұрақты әлеуметтік-экономикалық дамуына жағдай жасауға мүмкіндік береді.

Қолдауларыңызды сұраймын.